

## QUESTIO MEDICA.

CARDINALITIIS DISPUTATIONIBUS MANE  
discutienda in Scholis Medicorum, die Jovis 5. Martii.

M. NICOLAO LIENARD, Doctore Medico,  
& Facultatis Decano, Præside.

An Cometæ mortes & morbos portendunt?

I.

**H**OMINVM vitium est laborare metu vel desiderio futurorum ac proinde in ventura sollicitè inquirere, Medicorum curiosa nimis sedulitate & acri sed inutili studio in astris & à sideribus vitæ seu valetudinis, morborum aut mortis criseonque rationem, causam, ortum, ac eventum omnem repetere. Illorum ab omnibus retro seculis variis artibus quæsitæ prænotio; hinc ex avium volata auguria, ex mactatarum pecudum extis aruspicina, ex siderum Aspectu Astrologia, ex manuum linceis Chiromantia, ex vultu Physiognomoniam futura eruere temerè contenderunt. Ariolandi scientia ex rebus quibuscumque obviis sumpsit omnia, ex motu flammæ vario, ex spectris in prodeunte fumo conspicuis, ex superstitum cinerum figura, ex herbarum arborumve foliis, aliisque innumeris. Olim in usu fuere nobiles Homericæ sortes & Virgilianæ; clari fuerunt somniorum interpretes; viguerunt Artes Magicæ quamplurimæ; Electromantia quæ Galli ministerio perficiebatur, Necromantia quæ mortuorum animas evocare nitebatur ex inferis, ut ad quæsitæ de rerum exitu responderent; Coscinomantia quæ divinatio est per cribrum, onomantia per nomina; ejusdem sunt generis Hydromantia, Geomantia, Aëromantia & aliæ innumeræ. Horum, credula nimis ac superstitiosa dierum morbi computatio, morborum ut & variorum in corpore humorum dominii ex Saturni aliorumve Planetarum seu Conglobatorum astrorum pravo vel malefico influxu, qui nullus in iis admittendus est alius à lumine, origo repetita ad prophanum vulgus ableganda, non secus ac artes illæ omnes sive naturales sive magicæ; quas inter, nostris hisce temporibus plurimæ fraudis plenæ & ridiculæ, puellis tenellulis grata ac succi plena velut Helenæ an Menelaum abera fatuis virgunculis ineptisque mulieribus Amasiorum, importunis aulicis Regum optimorum favorem atque gratiam, Belligerantibus ipsis corpora Achillis instar ab omni tuta vulnere promittentes, cum fallacibus & ignatis earum authoribus Cachinnis Senicis ac plausu Theatrali potius excipiendæ quam furcis flammâ & igne plectendæ, nec magis audiendi his saltem ut sibi videntur sapientiores, qui res insolitas raroque visas uti Cometæ aliquid mortalibus aut ad vitam aut ad mortem, seu ad salutem seu ad morbum portendere existimant, si quæ portenti natura est, Cometæ non sunt rei future signum insolens contra naturæ ordinem apparens nihilque influunt in hæc sublunaria;

si mors ac morbi ejusdem in hoc cum cometis sortis atque conditionis sunt quid omnino naturale.

## I I.

**P**ORTENTIS plena Historia, timida hominum indoles fecit ut pauca dicerentur in bonis. Zoroaster ea quæ natus est die risit in futura presagium scientiæ; Servio Tullio adhuc puero dormienti caput arsit in futuri splendoris argumentum; in malis plurima habita sunt, supplicationibus & sacrificiis expiari solita; hæc inter monstra omnia, infans ore gemino cum dentibus binis & barba, quatuor oculis & duabus auriculis brevissimis; serpens ex muliere natus, porcus humano capite, puella biceps, anguis jubatus, anguis quadrupes. Narrant & in arboribus fruges natas, ex duabus alteram; laurum ex mediis ignibus inviolatam, sunt & multo magis incredibilia. Infans in utero matris clamavit Io triumphæ, ex muliere vir factus; Bos, canis, asinus loquuti sunt, cruenta fluxerunt flumina, arsit mare, volitarunt saxa, sudarunt statuæ; carne, lacte, sanguine, lapidibus pluit; in agro Mutinensi duo montes inter se concurrerunt crepitu maximo assultantes recedentesque, inter eos flammæ fumoque in cælum exeunte; hæc & similia prope infinita recensent in terris prodigia. In calis etiam non pauca numerantur, armorum strepitus auditi, tonitrua aëre puro, spectra varia deprehensa, hastæ militares ardentes, dimicantes acies, classis speciei, ardentes facies, igneæ trabes, halones, parhelia. Ist hæc inter cælestia portenta celebres Cometa, quos nunquam impunè visos affirmant, semperque cladem aliquam, strages, cedes, bella pestes, famem, mortem multorum hominum aut morbos plurimos portenta disse afferunt.

## I I I.

**S**TELLARVM crinitarum specie conspiciuntur in cælo Cometa, unde illi nomen, si crines in orbem æquabiliter circa stellam dispersi, quia sol ei ferè opponitur, criniti, si in longum insigni prolixitate fusi, barbati aut caudati appellantur sole in quocunque alio ad Cometam aspectu sinque posito, radius stellæ tantum hanc cæli partem respicientibus quæ soli opponitur; Barbati cum crines stellam præcedunt & prius oriuntur, ad eamque cæli partem vibrantur radii, quod Cometa proprio sibi motu videtur ferri; Caudati cum sequuntur stellam & post ipsam occidunt, ad eamque cæli partem expanduntur radii, à qua proprio sibi motu videtur Cometa destitit. Quamcumque formam induant cum suis crinibus neutiquam corpori stellæ adherentibus, sed per varias luminis radiorumque solis à stellæ reflexorum refractiones ibidem cum ea loci apparentibus, non sunt exhalationes calidæ sicca supra aërem evectæ ibique accesse; omnes supra lunam imò supra Saturnum ipsum positi quod halitus terreni non perveniunt, eorum Parallaxis aut nulla aut Lune ac Saturni minor; ex concrecente aura ætherià non gignuntur, non ex inspissatis firmamenti partibus quæ solis lucem remittunt ac proinde luceant; non sunt frustula è solari massa decerpta; non quedam è majoribus ejus maculis quas eructet, non plurimarum stellarum, quæ cerni propter incredibilem parvitatem habitâ distantia à terra ratione, nisi Galilei perspicillorum ope hætenus non potuerint, congeries instar Galaxiæ; dum incipiunt non sunt recens geniti, non pereunt cum evanescent; sidera sunt fixa primum, deinde errantia sui generis mundo cœva, olim proprio lumine postea alieno lucentia utpotè suo dimota loco,

maculis quibusdam crassioribus convestita, propiusque ad solem accedentia, quæ nec contra naturæ ordinem apparent, nec ullius rei futuræ signa sunt, non proinde mortis aut morborum qui suam omnem causam aliunde ex eodem cum Cometis ipsis naturæ penu & ex rerum variarum concursu vario repetunt; nec Cometæ quatenus astra quicquam influunt in hæc sublanaria, cum astrorum influxus ac ea quæ inde manas Chaldeorum Astrologorum futillis scientia, nullis fundata principiis, nullis firmata sufficientibus experimentis ac observationibus, quæ ad eosdem siderum positus, unde iidem manent effectus, plura postulat sæculorum millia, prorsus sit omni sanâ excipienda.

## I V.

**I**N universo triplicis sunt generis Sydera, fixa è quorum numero Sol; errantia seu Planetæ quos inter nostra Tellus; Cometæ plures non unus tantum post annorum seriem recurrens. Omnia hæc corpora intra naturæ leges suos habent in immenso Æthere motus. Sydera fixa suo sunt affixa loco, non eidem solido Cælo, à se invicem plurimum distant secundum omne dimensionis genus. Vnumquodque suum habet fluidum orbem in cuius centro ponitur, dum inibi circa suum volvitur axem & proprium orbem & Planetas si qui sint circumducit. In horum albo recensetur Syrius ardens, Canis vulgò dictus cordatioribus Medicis spernendus, quod frustra timidi Canis insar latret nec quemquam mordeat, sub quo ut & ante non ita reformidandæ purgationes, ut nec Solstitiorum temporibus, etsi non idem prorsus iudicium de utroque Æquinoctio saltem apud causarios homines sit faciendum. Planetæ, Telluri in omnibus ferè congenere reflexâ omnes Solis luce fulgent; circa Solem sub Zodiaco moventur, non tamen eodem tempore motum absolvunt; Soli propiores citius, remotiores tardius. Terræ motus annuus est; ut in Tellure sic in Marte & Venere observatur peculiaris motus circa axem proprium, hic Terræ motus diurnus appellatur; tertius est inclinationis, quo Poli ejus ab Eclyptica Poli recedunt & modi Poli perpetuò obvertuntur, hic ferè annuus est, nec præcisè tamen annum assequitur. A motu diurno diei & noctis vices; ob annum Sol duodecim videtur percurrere Zodiaci signa; à motu inclinationis pendet tempestatum diversitas & Æquinoctiorum præcessio. Cometæ Planetis non multum absimiles nisi crinibus & itinere quod in Cælo sequuntur. Isti moventur semper sub Zodiaco intra Tropicos nec orbem sui Syderis solisve cuius sunt deserunt unquam, illi sæpè ultra Tropicos recto forsan itinere ab uno orbe in alium migrant. Nobis apparent cum Solis orbem ingrediuntur nec ejus occultantur radiis, evanescent cum egrediuntur & in alium transeunt. Vt Planetarum occursum & oppositiones ita Cometarum adventus certè prædiceretur, si, quod impossibile est, omnium stellarum fixarum orbem omniumque totius Vniversi corporum situs & motus cognoscerentur.

## V.

**A**COMETIS nihil metuendum Principibus neque Plebeis. Cuiam mundi plage caput aut caudam obverterint nullius interest, eos certis quibusdam in Cæli signis magis timendos temerè dicitur. Fati naturalis legibus acti suam cunct viam, nec præsentium malorum causæ nec impendentium signa. Si quandoque Principum interitus, Populorum glades, Morbi Epidemii, Regnorum everasio, Vr-

bium submersio, aut quidvis aliud calamitosum Cometæ sequutum sit id casu factum. Mistæ densantur Principum & Subditorum funera, profligantur Exercitus, vastantur Regna, anni sunt steriles, fames invalescit, grassatur pestis nullis præcænis Cometis. Rex Invioltissimus, LUDOVICUS MAGNUS, quo non bello major & armis, supremi Numinis muneribus potens ac beatus undique, belli pacisque arbiter omnibus ferè totius Europæ in se unum conjuratis Principibus ac sædere minaci junctis solus obstitit, eorum impetus non sustinuit modò sed & repressit, ingentes exercitus delevit terræ marique, captivos duxit plurimos, innumeras Vrbes aut diruit aut in de- ditionem accepit, agros vastavit, Arces expugnavit munitissimas; an ad id non fortitudo Regis divinâ potiùs quàm humana aut heroïca, non consummata in Imperatore etiam juniore bellica peritia, quàm fortuna aut stella aliqua plus potuit? An non LOVOYUS parentis optimi TELLERII Galliæ Cancellarii proles melior, ejusque ad rem omnem bellicam adornandam salutaria consilia? An non COLBERTI sagax ad comparandam, belli nervum omnem, rem pecuniariam prudentia? An non Militiæ Gallicæ ubique ad Regis Imperatoris sui paratæ obsequium, ad trananda Flumina, ad superandum cum Cæsare suo Rhenum mira expeditaque alacritas plus valere, quàm ad frangendos hostes ullus Cometa? An ulla prælaxerunt in Cælo portenta insolita, ulli Cometæ, qui tot imminetia temerariis malèque memoribus hostibus mala portenderent? An non quod annò ultimò capta sine cæde Argentina, sine sanguine, pene sine pulvere deditum Casalium, id LUDOVICI MAXIMI clementiæ debetur atque felicitati potiùs, quàm anni præcedentis Cometæ? Qui si minùs desipuissent Germani, si se Iberi continuissent, utrique à Cometa non ita vapulassent; sapiens etenim dominabitur Astris. Seu ergo præfuerint seu abfuerint Cometæ omnia puri modò eveniunt. Conspectæ novæ stellæ seu apparentes, expantæ seu evanescentes veteres nullum pariter malum præsagiunt. Potest fixum Sydus obductis maculis conspectum fugere, iisdem deletis atque obliteratis repentè læcere, utrumque juxta naturæ naturæ leges; Easdem sequuntur Lunæ Solisque defectus, Halonæ, Ignæ Trabes, Parbeliæ. Cætera prodigia, aut fictitia, aut naturales effectus, aut monstra, quæ dementiâ solùm & stupore vulgi portenta credita sunt. Ejus est homo indolis in hoc cæteris animantibus infelicio, ut propriis malis quæsi non contentus extranea sibi asciscat, in Cometis cæterisque rebus à periculo morte & morbo vacuis stultè quarit quod metuat.

Ergò Cometæ mortes & morbos non portendunt.

Afferebat Parisiis JOANNES POISSON, Parisinus,  
Baccalaureus Medicus. A. R. S. H. 1682.

---

PARISIIS,  
Apud Franciscum Muguet, Regis & Facultatis Medicinæ Typographum.